

REGLUGERÐ

fyrir Alþýðubankann hf.

I. KAFLI

Stofnun bankans og skipulag.

1. gr.

Alþýðubankinn hf. er stofnaður fyrir frumkvæði ábyrgðarmanna Sparisjóðs alþýðu samkvæmt heimild í lögum nr. 71/1970 um Alþýðubankann hf. Tók félagið við öllum eignum, skuldum og ábyrgðum Sparisjóðs alþýðu og starfsemi hans og kemur í hvívetna í hans stað, enda samþykktu ábyrgðarmenn sparisjóðsins yfirtökuna á fundi hinn 12. nóvember 1970. Bankinn er hlutafélag og má hlutafé hans ekki vera minna en 400 000,00 króna. Hlutaféð er nú 6 800 000,00 krónur.

2. gr.

Með yfirstjórn bankans fer fundur hluthafa svo sem segir í samþykktum félagsins, bankaráð sem kosið er á aðalfundi bankans og skipað er 5 aðalmönnum og 5 varamönnum og bankastjórn, einn eða fleiri bankastjórar, sem bankaráð ræður.

II. KAFLI

Starfsemi bankans.

3. gr.

Alþýðubankinn hefur sparisjóðsréttindi og nýtur í hvívetna sömu réttinda sem Landsbanka Íslands eru veitt í 18. 19. 21. og 23. grein laga nr. 11 frá 29. mars 1961.

4. gr.

Hlutverk Alþýðubankans er að reka hvers konar bankastarfsemi, er hafi það að markmiði að efla atvinnuþróun og treysta atvinnuöryggi launafólks, svo og að styðja menningarlega og félagslega starfsemi verkalyðshreyfingarinnar á Íslandi. Þetta hlutverk sitt leysir bankinn af hendi með því:

- a) Að taka við spariinnlánum og veltiinnlánum til ávöxtunar og varðveislu.
- b) Að kaupa og selja víxla, tékka og aðrar ávísanir.
- c) Að kaupa og selja verðbréf.
- d) Að veita hvers konar lán önnur gegn tryggingum sem bankinn metur gildar.
- e) Að kaupa og selja erlendan gjaldeyri og reka hvers kyns erlend bankaviðskipti, sbr. þó ákvæði 30. gr.
- f) Að annast bókhaldslegar gagnaskráningar og tölvufærslur.
- g) Að hafa með höndum umsjón og varðveislu eigna.
- h) Að geyma vermæti gegn gjaldi.
- i) Að annast önnur venjuleg viðskiptabankastörf.

A. Innlán.

1. Spariinnlán.

5. gr.

Bankinn tekur við spariinnlánum til ávöxtunar, minnst kr. 1,00 í senn. Bankinn er eigi skyldur til að taka á móti mjög stórum upphæðum til ávöxtunar, ef bankastjórn telur það óhagkvæmt.

6. gr.

Pegar stofnað er til spariinnlánsviðskipta er viðskiptamanni fengin sérstök sparisjóðsbók eða viðtökuskírteini. Í sparisjóðsbókina eru færðar allar færslur á viðkomandi innlánsreikningi. Pegar ný sparisjóðsbók er afhent greiðir viðskiptamaður fyrir hana gjald skv. ákvörðun bankastjórnar.

Sá sem leggur inn eða tekur út fé af spariinnlánsreikningi skal afhenda útfyllt eyðublað skv. nánari ákvörðun bankastjórnar. Sparisjóðsbækur skulu að jafnaði bera nafn eiganda þeirra, en heimilt er einnig að auðkenna þær eða að hafa þær nafnlausar án auðkenna. Vanti einhverjar þær upplýsingar sem eyðublaðið krefst getur bankinn neitað um afgreiðslu.

Pegar fé er lagt inn eða tekið út af sparisjóðsreikningi skal það fært í bókina. Heimilt er þó að taka við innborgunum gegn kvittun án þess að sparisjóðsbók sé sýnd, enda fellur slík kvittun úr gildi, þegar innborgun hefur verið færð í bókina, næst þegar bókin er sýnd í bankanum.

Eigendur spariinnlánsreikninga geta mælt svo fyrir, að aðrir en þeir sjálfir megi ekki leggja inn eða taka út fé af reikningi þeirra, enda afhendi þeir bankanum rithandarsýnishorn sitt um leið. Að öðrum kosti ber bankinn eigi ábyrgð á heimildarlausri úttekt eða innborgun.

7. gr.

Vextir af spariinnlánnum reiknast í krónum og aurum af hverju innleggi frá og með næsta degi eftir að féð er lagt inn. Við úttekt reiknast vextir frá og með úttektardegi.

Vextir skulu leggjast við höfuðstól innstæðna minnst einu sinni á ári. Vexti skal færa í sparisjóðsbækur þegar þær eru í fyrsta sinn sýndar í bankanum eftir að þeir voru lagðir við innstæður.

8. gr.

Spariinnlánnum má skipta í flokka eftir því hvort krafist er uppsagnarfrests á innstæðum eða ekki. Af fé sem stendur inni á almennum spariinnlánsreikningi verður greitt það er menn óska, án uppsagnarfrests. Þó er bankastjórn heimilt að áskilja að upphæðum frá kr. 10 000,00 til kr. 25 000,00 sé sagt upp með viku fyrirvara og upphæðum þar yfir með eins mánaðar fyrirvara. Án eins mánaðar uppsagnarfrests er bankinn eigi skyldur að greiða meira en 25 000,00 á mánuði hverjum af sama spariinnlánsreikningi.

Um þær tegundir spariinnlána þar sem uppsagnarfrests er krafist fer eftir reglum sem settar eru af bankastjórn. Heimilt er að greiða hærri vexti af bundnum innstæðum en af fé með venjulegum sparisjóðskjörum.

9. gr.

Bankastjórn er heimilt að segja lausu fé á spariinnlánsreikningum með þriggja mánaða fyrirvara, annað hvort með áritun í bókina eða auglýsingu í Lögbirtingablaði. Eftir að sá fyrirvari er liðinn greiðast engir vextir af því fé sem sagt er upp.

10. gr.

Glatist sparisjóðsbók ber eiganda að snúa sér til bankans er annast um að handhafa hennar verði stefnt skv. 19. gr. laga nr. 11/1961, sbr. 11. gr. laga um Alþýðubankann hf. Kostnaðinn greiðir eigandinn.

11. gr.

Ef eigandi að innstæðufé hvorki leggur inn fé né tekur út í 19½ ár samfleytt verður hætt að greiða vexti af því og er þá heimilt með auglýsingu, er skal birt með misseris fyrirvara á þann hátt sem segir í 9. gr., að skora á eiganda að vitja fjárins. Gefi hann sig eigi fram, áður en fresturinn er liðinn, er viðskiptabók hans ógild, en féð ásamt vöxtum rennur til bankans, sbr. 2. gr. laga nr. 14/1905.

2. Veltiinnlán.

12. gr.

Bankinn tekur við fé til ávöxtunar á veltiinnlánum (ávísanareikningar og hlaupareikningar) sem stofnaðir eru með þeirri lágmarksfjárhæð er bankastjórn ákveður á hverjum tíma. Viðskiptamaður sem óskar að opna veltiinnlánsreikning skal leggja fram skriflega umsókn þar sem tilgreint er nafnnúmer umsækjanda, fæðingardagur og ár, atvinna og heimilisfang. Sé umsækjandi ekki þekktur í bankanum getur bankinn krafist meðmæla tveggja manna sem bankinn viðurkennir. Veltiinnlánsreikningar skulu ekki opnaðir fyrr en að vel athuguðu máli.

Sá sem leggur inn fé á veltiinnlánsreikning skal afhenda útfyllt eyðublað, skv. nánari ákvörðun bankastjórnar. Bankinn greiðir úr fé af veltiinnlánsreikningum gegn tékkum sem ritaðir eru á sérstök eyðublöð bankans og útgefin af eiganda reikningsins eða þeim sem hann hefur gefið umboð. Sá sem heimild hefur til útgáfu tékka á reikning skal afhenda bankanum rithandarsýnishorn sitt. Þegar viðskiptamaður fær tékkhefti skal hann greiða fyrir það gjald skv. ákvörðun bankastjórnar. Bankinn getur neitað að greiða tékka sem eigi eru rétt útfylltir skv. formi sínu.

Greiði bankinn falsaðan tékka eða tékka sem gefinn hefur verið út í heimildarleysi og tékkinn er útgefinn á eyðublað úr tékkhefti sem reikningseigandi hefur sjálfur fengið þá skal hann bera skaðann nema augljósu gáleysi starfsmanna bankans sé um að kenna.

13. gr.

Enginn má gefa út tékka á meira fé en hann á innstæðu fyrir nema um slíkt sé sérstaklega samið við bankastjórn, sbr. 19. og 23. gr. Sé um misnotkun tékkareiknings að ræða skal fara með það mál eftir reglum sem bankastjórn setur. Bankanum er jafnframt heimilt að eiga aðild að samkomulagi banka og sparisjóða um tékkaviðskipti. Sé um ítrekað eða alvarlegt tékkamisferli að ræða er bankanum heimilt að loka viðkomandi reikningum tafarlaust og innkalla um leið óútgefin tékkaeyðublöð sem reikningseigendur kunna að hafa undir höndum.

14. gr.

Bankinn afhendir eigendum veltiinnlánsreikninga útskriftir af reikningum þeirra þar sem sýndar eru allar færslur á viðkomandi reikningi. Þessar útskriftir skulu afhentar eigendum eins oft og bankastjórn telur fært en þó eigi sjaldnar en einu sinni á ári.

15. gr.

Þrátt fyrir ákvæði 12. gr. er bankanum heimilt að greiða út fé af veltiinnlánsreikningi skv. skriflegum fyrirmælum reikningseiganda eða símskeyti hans, staðfest á venjulegan hátt, enda gangi greiðslan inn á annan reikning við bankann eða til annars banka eða sparisjóðs. Þá er bankanum heimilt að ráðstafa fé af veltiinnlánsreikningum til greiðslu gjaldfallinna skulda reikningseiganda við bankann. Allar slíkar skuldbindingar skulu tilkynntar reikningseiganda tafarlaust.

16. gr.

Í tékkaávísun sem gefin er út á innstæðu á veltiinnlánsreikningi verður upphæðin að vera tilgreind með tölustöfum og bókstöfum. Sé þess ekki gætt þá er bankinn eigi skyldur til að greiða ávísanaupphæðina. Sé fjárhæðin tilgreind öðruvísi með tölustöfum en bókstöfum, þá gildir sú upphæð sem með bókstöfum er skráð.

17. gr.

Um fyrningar innstæðu á veltiinnlánsreikningum gilda ákvæði 11. gr.

3. Önnur innlán.

18. gr.

Bankanum er heimilt að taka til ávöxtunar fé með öðrum hætti en að framan greinir, svo sem viðtökuskírteini, og skulu þá um slík viðskipti gilda sérstakar reglur sem bankastjórn setur.

B. Útlán.

19. gr.

Útlánastarfsemi bankans skal hagað svo að sem best samrýmist því hlutverki hans að efla atvinnuþróun og treysta atvinnuöryggi launafólks, svo og að styðja menningarlega og félagslega starfsemi verkalyðshreyfingarinnar á Íslandi.

20. gr.

Bankinn leysir útlánsstarfsemi sína af hendi með:

- a) Kaupum á víxlum.
- b) Yfirdráttarlánnum á hlaupareikningum.
- c) Kaupum á skuldabréfum og öðrum verðbréfum.
- d) Framleiðslu-, rekstrar- og samkeppnislánnum.
- e) Fasteignaveðlánnum veðdeildar.
- f) Öðrum lánnum sem samrýmast háttum viðskiptabanka.

21. gr.

Synjun bankans á lánsbeiðnum þarf ekki að vera skrifleg og ekki verður bankinn krafinn um ástæðu til synjunar.

22. gr.

Bankastjórn skal að jafnaði krefjast þess að settar séu tryggingar fyrir útlánnum bankans, svo sem fasteignaveð, sjálfsvörsluveð í lausafé, handveð, ábyrgð eða aðrar tryggingar sem bankastjórn telur fullnægjandi.

23. gr.

Um yfirdráttarlán skal að jafnaði gerður sérstakur lánssamningur. Skal í honum greint hámark lánsins og gjalddagi. Um útborgun yfirdráttarlána gilda reglur 12. 13. og 15. gr. reglugerðar þessarar.

24. gr.

Um framleiðslulán, rekstrarlán og samkeppnislán gilda reglur sem settar eru af bankastjórn í samræmi við reglur um framleiðslulán og rekstrarlán sem Seðlabankinn ákveður og ákvarðanir Útflutningslánaþjófssjóðs um samkeppnislán.

25. gr.

Bankanum er heimilt að kaupa og selja verðbréf ríkisins, bæjar- og sveitarfélaga og önnur trygg verðbréf. Hlutabréf má bankinn ekki kaupa né selja nema í umboði annarra.

26. gr.

Um fasteignaveðslán veðdeildar bankans gilda ákvæði III. kafla þessarar reglugerðar.

27. gr.

Bankanum er heimilt að veita lán með öðrum hætti en að framan greinir enda sé þess gætt að slík lán samrýmist eðlilegri bankastarfsemi.

C. Ábyrgðir.

28. gr.

Bankanum er heimilt að ábyrgjast greiðslu til innlendra og erlendra aðila fyrir viðskiptamenn sína gegn skilyrðum þeim og tryggingum sem bankastjórn ákveður hverju sinni. Ábyrgð er einföld nema annað sé tekið fram,

D. Innheimtur.

29. gr.

Bankinn annast innheimtur fyrir innlenda og erlenda kröfuhafa hérlendis og erlendis.

E. Gjaldeyrisverslun.

30. gr.

Bankanum er heimilt að annst kaup og sölu á erlendum gjaldeyri skv. gildandi lögum og reglum um gjaldeyrisverslun. Ákvæði þessarar greinar svo og önnur ákvæði er lúta að viðskiptum við erlenda aðila öðlast ekki gildi fyrir en bankinn fær leyfi til gjaldeyrisverslunar.

F. Önnur starfsemi.

31. gr.

Bankinn hefur með höndum gagnaskráningar og tölvufærslur og umsjón og varðveislu eigna skv. nánari ákvörðun bankastjórnar og bankaráðs.

32. gr.

Bankinn annast öll önnur venjuleg viðskiptabankastörf.

III. KAFLI**Veðdeild.**

33. gr.

Veðdeild Alþýðubankans hf. starfar sem fjárhagslega sjálfstæð deild undir sömu stjórn og Alþýðubankinn. Eignum og skuldum veðdeildarinnar svo reikningshaldi öllu skal haldið aðskildu frá öðrum deildum bankans. Endurskoðendur bankans annast endurskoðun veðdeildarinnar.

34. gr.

Veðdeildin veitir sérstök fjárfestingarlán til langs tíma til eflingar atvinnuþróun og atvinnuöryggi, til íbúðarbygginga og íbúðarkaupa og til menningarlegrar og félagslegrar starfsemi. Lánin skulu vera með veði í fasteign. Hvert einstakt lán má þó ekki vera hærra en 50% af virðingarverði fasteignar þeirrar sem trygging er tekin í að viðbættum áhvílandi veðböndum. Lánstími skal að jafnaði ekki vera styttri en 10 ár.

35. gr.

Til fjáröflunar fyrir veðdeildina er Alþýðubankanum heimilt að gefa út skuldabréf er hljóða á nafn. Bankastjórn ákveður fjárhæð bréfanna og aðra skilmála að höfðu samráði við bankaráð og í samræmi við gildandi reglur um fjárfestingarlánasjóði. Einnig er Alþýðubankanum heimilt að gefa út skuldabréf (bankavaxtabréf) fyrir veðdeildina er hljóði á handhafa. Ráðherra ákveður fjárhæð þeirra bréfa og aðra skilmála að fengnum tillögum bankaráðs og bankastjórnar.

36. gr.

Að öðru leyti en að framan getur gilda um veðdeildina sömu ákvæði reglugerðar þessarar og um aðrar deildir og starfsemi bankans.

37. gr.

Alþýðubankinn hf. ber fulla ábyrgð á öllum skuldbindingum veðdeildarinnar.

IV. KAFLI

Stjórn bankans.

38. gr.

Með yfirstjórn bankans fer fundur hluthafa, bankaráð og bankastjórn svo sem segir í samþykktum bankans. Bankaráð hefur æðstu forstöðu bankans utan hluthafafunda og ræður það bankastjóra auk annarra þeirra starfa er segir í 25. gr. samþykktu bankans.

39. gr.

Bankastjórn Alþýðubankans er skipuð bankastjórum hans og hefur hún með höndum daglega stjórn á starfsemi bankans í samræmi við lög um bankann, samþykktir bankans, reglugerð þessa og ákvörðun bankaráðs.

40. gr.

Bankastjórnin ráðstafar fé bankans og ber henni að sjá um að bankareksturinn sé í öllum greinum samkvæmt lögum bankans, samþykktum hans og reglugerð þessari. Bankastjórnin ræður starfsmenn bankans aðra en þá sem bankaráðinu er falið sérstaklega að ráða og segir þeim upp. Hún segir þeim fyrir um skyldur þær er á þeim hvíla og um störf þau sem þeir eiga að annast og hefur eftirlit með að það sé framkvæmt sem þeim er lagt á herðar.

41. gr.

Bankastjórn skal undirrita svo að skuldbindi bankann ef gefa skal út eða framselja víxla, önnur verðbréf eða skriflegar skuldbindingar. Undirskrift bankastjórnar og eigi annarra þarf til þess, svo gilt sé, að leigja eignir eða taka á leigu, undirrita skuldabréf eða gera aðrar meiri háttar ráðstafanir í nafni bankans.

Bankaráð getur veitt tilteknum öðrum starfsmönnum bankans umboð til að skuldbinda bankann skv. 1. málsgrein með undirskrift sinni ásamt bankastjóra. Bankaráð getur ennfremur veitt tilteknum starfsmönnum umboð til að skuldbinda bankann ásamt starfsmönnum þeim er umboð hafa samkvæmt framangreindu þegar gefa skal út innlenda og erlenda tékka, ábyrgðarskuldbindingar, framselja víxla til innheimtu og undirrita sparisjóðsbækur og viðtökuskírteini.

42. gr.

Bankastjórn skal gæta þess að bankinn eigi ávallt hæfilegan hlut eigna sinna í auðseldum verðbréfum, víxlum og lánum, sem greiðast eiga á skömmum tíma. Skal eign bankans í ríkisskuldabréfum, ríkistryggðum verðbréfum, bankavaxtabréfum Landsbanka Íslands eða öðrum jafntryggðum og auðseldum verðbréfum og innstæðum í öðrum bönkum vera að minnsta kosti 15% af innstæðum af spariinnlánum, sbr. 10. gr. laga um bankann nr. 71/1970. Verðbréfaeign þessi skal hækka í allt að 20% ef viðskiptaráðherra, að fengnum tillögum stjórnar bankans, telur þess þörf. Í stað verðbréfa má koma inneign í Seðlabankanum.

43. gr.

Við ákvörðun um heildarfyrirgreiðslu til eins viðskiptaaðila í formi úrlána og/eða ábyrgða skal bankastjórn gæta þess að heildarfjárhæðin sé í hæfilegu hlutfalli við eigið fé bankans með hliðsjón af þeim tryggingum sem settar hafa verið og fjárhag viðskiptaaðilans.

44. gr.

Bankastjórn er rétt og skylt að sitja fundi bankaráðs og taka þátt í umræðum nema rétt sé um mál sem snerta þá sjálfa. Að minnsta kosti einu sinni í mánuði skal bankastjórn leggja fram á fundi bankaráðs skýrslu um innlán og útlán bankans og um annað það sem bankaráðinu þykir nauðsynlegt til þess að geta haft eftirlit með starfsemi bankans.

45. gr.

Alþýðubankanum er heimilt að eiga í öðrum fyrirtækjum eða stofnunum sem reka bankastarfsemi eða aðra starfsemi sem skyld er bankastarfsemi eða er í eðlilegum tengslum við hana. Slík eignaraðild skal ákveðin af bankaráði að fengnum tillögum bankastjórnar. Umfram það sem hér er heimilað má Alþýðubankinn ekki á neinn hátt bera ábyrgð sem þátttakandi eða meðeigandi í rekstri annarra fyrirtækja eða stofnana, sbr. þó 46. gr.

46. gr.

Bankanum er heimilt án takmarkana að yfirtaka eignir til að tryggja fullnustu kröfu. Eignirnar skulu seldar strax og það er talið hagkvæmt að mati bankaráðs að fengnum tillögum bankastjórnar.

47. gr.

Útibú bankans annast þau bankastörf sem bankaráð og bankastjórn ákveða og samkvæmt ákvæðum reglugerðar þessarar. Útibústjórnar hafa á hendi stjórn daglegrar starfsemi útibúanna samkvæmt fyrirmælum bankastjórnar og í umboði hennar. Bankastjórn getur með samþykki bankaráðs veitt tilteknum starfsmönnum útibúsins umboð til að skuldbinda útibúin ásamt útibússtjóra.

V. KAFLI

Bókhald, reikningsskil og endurskoðun.

48. gr.

Reikningsár Alþýðubankans er almanaksárið. Ársreikningur skal hafa að geyma ársskýrslu, rekstrarreikning og efnahagsreikning. Skal gerð ársreiknings lokið fyrir febrúarlok og skal hann lagður fyrir endurskoðendur án tafar og eigi síðar en einum og hálfum mánuði fyrir aðalfund.

Ársreikningur skal undirritaður af bankaráði og bankastjórn. Hafi bankaráðsmaður eða bankastjóri mótbárur fram að færa gegn ársreikningi skal hann undirritaður með fyrirvara og gera skal grein fyrir því í ársskýrslu hvers eðlis fyrirvarinn er. Ársreikning skal birta í Stjórnartíðindum.

Yfirlit yfir hag Alþýðubankans skal gera mánaðarlega.

49. gr.

Aðalbókari bankans hefur yfirumsjón með öllu bókhaldi aðalbankans og útibúa. Bókhaldið og þar með talin öll fylgiskjöl og önnur færslugögn skulu vera í skipulegu og öruggu kerfi. Allt innra eftirlit í bókhaldskerfinu skal vera sem öruggast. Bókhald bankans skal gert upp og afstemmt daglega en sérstakt reikningsyfirlit skal gert um hver mánaðamót.

Allar breytingar eða leiðréttingar í bókhaldi bankans skulu þannig gerðar að glöggst sjáist hvað þar hefur staðið upphaflega. Um gerð bókhaldsins fer að öðru leyfi eftir ákvæðum laga um bókhald.

50. gr.

Bankanum er heimilt að taka þátt í Reiknistofu bankanna og láta færa bókhald bankans þar.

51. gr.

Aðalgjaldkeri bankans hefur umsjón með öllu lausu fé aðalbankans og útibúa. Fyllsta öryggis skal gætt við geymslu seðla og myntar svo og alla gjaldkeraafgreiðslu.

52. gr.

Endurskoðendur skulu kosnir og tilnefndir með þeim hætti sem segir í samþykktum bankans. Endurskoðendur skulu vera lögráða og fjár síns ráðandi. Þeir skulu hafa góða þekkingu og reynslu í bókhaldi og bankaviðskiptum. Þeir mega ekki vera í þjónustu Alþýðubankans að öðru leyti, bankaráðsmanna, bankastjóra eða þeirra starfsmanna sem annast eða hafa eftirlit með bókhaldi bankans eða fjármálum. Endurskoðandi má heldur eigi vera maki þessara aðila, skyldur þeim eða tengdur að feðgatali eða niðja eða fyrsta lið til hliðar, kjörforeldri þeirra eða kjörbarn, fósturforeldri eða fósturbarn.

53. gr.

Endurskoðendur skulu haga störfum sínum í samræmi við góða endurskoðunarvenju þar með eru taldar kannanir á hvort eignir bankans séu fyrir hendi og það fé í sjóði sem vera á hjá þeim starfsmönnum sem fé hafa undir höndum.

Bankaráð og bankastjórn skulu veita endurskoðendum aðstöðu til að framkvæma þær athuganir sem þeir telja nauðsynlegar. Skal þeim heimill aðgangur að öllum bókum bankans og skjölum og jafnframt skal bankaráðið og starfsmenn bankans veita þeim allar umbeðnar upplýsingar sem unnt er að láta í té.

Verði endurskoðendur þess varir að vanræksla eigi sér stað í einhverju eða nauðsynlegar endurbætur þurfi að gera eiga þeir að færa athugasemdir í sérstaka endurskoðunarbók og benda bankastjórn og bankaráði á það og gera tillögur um endurbætur.

54. gr.

Endurskoðendur skulu í samræmi við góða endurskoðunarvenju endurskoða ársreikninginn og í því sambandi kanna bókhaldsgögn bankans og aðra þætti er varða rekstur hans og stöðu þannig að þeir séu þess fullvissir að bókhaldið sýni rétta mynd af því sem fram hefur farið. Um framkvæmd endurskoðunar á ársreikningi bankans skal fara eftir því sem segir í samþykktum bankans. Endurskoðendur hafa rétt til að sitja hluthafafundi bankans. Endurskoðanda og samstarfsmönnum hans er óheimilt að gefa einstökum hluthöfum eða óviðkomandi aðilum upplýsingar um hag bankans.

55. gr.

Laun endurskoðenda skulu ákveðin af aðalfundi Alþýðubankans hf.

VI. KAFLI

Starfsmenn bankans.

56. gr.

Ekki verða gefnar upplýsingar um viðskipti manna við bankann, skuldir þeirra né eignir. Bankaráðsmenn, bankastjórar og aðrir starfsmenn bankans eru bundnir þagnarskyldu um allt það er snertir hagi viðskiptamanna bankans og þeir fá vitneskju um í starfi sínu. Þagnarskyldan helst þótt þeir láti af starfi.

Allir starfsmenn bankans skulu undirrita drengskaparheit um það að þeir skuli gegna þeim störfum sem þeim eru falin með árvekni og samviskusemi og ekki gera neinum óviðkomandi kunnugt um málefni bankans né viðskipti einstakra aðila við hann.

57. gr.

Starfsmenn bankans mega ekki vera í ábyrgðum fyrir skuldunauta bankans né heldur gerast umboðsmenn annarra gagnvart bankanum. Starfsmenn bankans mega ekki, án leyfis bankastjórnar, taka að sér launuð störf eða reka atvinnu.

VII. KAFLI

Ýmis ákvæði.

58. gr.

Reglugerð þessi, sem sett er samkvæmt lögum nr. 71 frá 12. maí 1970 um Alþýðubankann hf. og aðalfundur bankans hefur hinn 30. apríl 1983 samþykkt, staðfestist hér með og öðlast þegar gildi.

Jafnframt er felld úr gildi reglugerð nr. 330/1972 fyrir Alþýðubankann hf. með áorðnum breytingum skv. reglugerð nr. 119/1973.

Viðskiptaráðuneytið, 26. október 1983.

Matthías Á. Mathiesen.

Björn Líndal.

SAMÞYKKTIR

fyrir Alþýðubankann hf.

I. KAFLI

Heiti félagsins, heimilisfang og hlutverk.

1. gr.

Félagið heitir Alþýðubankinn hf., og er það nefnt Alþýðubankinn í samþykktum þessum.

Félagið er stofnað fyrir frumkvæði ábyrgðarmanna Sparisjóðs alþýðu, samkvæmt heimild í lögum nr. 71/1970 um Alþýðubankann hf. Tekur félagið við öllum eignum, skuldum og ábyrgðum Sparisjóðs alþýðu og starfsemi hans og kemur að öllu leyti í hans stað, enda hafa ábyrgðarmenn sparisjóðsins á fundi sínum hinn 12. nóvember 1970 samþykkt yfirtökuna.

2. gr.

Heimili Alþýðubankans, aðalskrifstofa og varnarþing er í Reykjavík. Auk aðalskrifstofunnar getur stjórn félagsins, er nefnist bankaráð í samþykktum þessum, ákveðið að setja á stofn umboðsskrifstofur og útibú samanber þó 10. gr. laga nr. 10 frá 29. mars 1961 um Seðlabanka Íslands.